

FINANTZA LEGEAREN ERREFORMA. Kutxen finantzaketa pribatuari bide berria ireki diote, partaidetza kuotak jasota. Gainera, informazioa eta ikuskaritzak zorrozteko neurriak ekarriko ditu.

Gaur sartuko da indarrean kutxetan ordezkaritza politikoa %50era murriztuko duen legea

Udaletxe eta aldundiek kutxetan egun duten partaidetza murriztu beharko dute

LEGEAREN EDUKIA

Gaur indarrean sartuko den legeak 20 finantza lege ukituko ditu. Hauek dira neurri nagusiak.

KUTXEN GOBERNU ORGANOAK.

Udaletxe eta foru aldundiek egun finantza erakundeetako gobernu kontseiluetan duten ordezkaritza %50era mugatu beharko dute. Erakundeetako presidenteez gehienez 70 urte izango dituzte, eta kontseilari ordezkariak gehienez 12 urtez egon ahal izango dira. Era berean, enplegatu eta ezarle edo bezeroen partaidetza handitu nahi da.

PARTE-HARTZE KUOTAK. Parte-hartze kuotak (boto eskubide gabeko akzioen antzekoa) jaulki ahal izango dituzte aurrezki kutxek, betiere baliabide propioen %50era iritsi gabe eta pertsona juridiko edo fisiko batek ez badu %5 eskuratzen.

AUDITORIARI. Legeak dio ikuskaritza firma batek ezingo dituela aztertu zazpi urte baino gehiagoz burtsan kotizatzen duten edo 30 milioi baino gehiago fakturatzen dituzten enpresak.

INFORMAZIOA. Akziodun eta administratzaileen informazioa plazaratu beharko dute enpresek. Legeak neurriak hartzen ditu informazio pribilegiatuaren eta merkatuetan eragina izan dezakeen informazio faltsuaren aurka.

HIPOTEKEN BIRIBILTZEA. Finantza erakundeek interes aldakorrek maila hipotekarioetan ezartzen duten biribiltzea gehienez %0,125era mugatuko da.



Nafarroako Kutxa, Gipuzkoa-Donostia Kutxa, Bilbo-Bizkaia Kutxa eta Vital Kutxa eragingo du legeak.

Erredakzioa | DONOSTIA

Gaur bertan jarriko da indarrean PPren gobernuak aurrera eramandako Finantza Legearen Erreforma. Iragan martxoan aldaketari ekin eta urriaren amaieran onartu ondoren, atzo argitaratu ziren Espainiako Buletin Ofizialean legearen nondik norakoak. Lege aldaketa horiek Hego Euskal Herriko kutxetan eragin handia izango dute.

Hainbat finantza lege aldatu ditu PPren azken erreformak, 20 inguru. Kutxen gobernu zein administrazio organoetan izango du eragina, besteak beste. Hala, Europako Batasunaren eskariei jarraiki, erakunde publikoek kutxetan duten partaidetzari muga ezarriko dio legeak (%50era murriztuko du).

Neurri horrek, beraz, Nafarroako Kutxa, Gipuzkoa-Donostia Kutxa, Bilbo-Bizkaia Kutxa eta Vital Kutxa izango du eragina. Euskal Autonomia Erkidegoko kasuan, erakunde publikoek kutxen gobernu organoetan duten partaidetza

EAEko Aurrezki Kutxen Legean dator zehaztuta, eta gaur egun, %54koa da: hiriburuetako udalek eta aldundiek partaidetzaren %16 dute, eta kutxak dauden herrietako udaletxeek, beste %38koa.

Partaidetza publikoak %50etik gorakoak direla eta, lege berriak EAEn izan dezakeen «tokia» aztertuko duela adierazi du Eusko Jaurlaritzak. Gainera, kutxek euren estatutuak aldatu beharko dituzte lege berriaren egokitzeko.

Kutxen gobernu organoetan eragina izango duen beste legea partaidetza kuoten onarpena da. Partaidetza kuotak botorik gabeko akzioen antzeko tituluak izango dira. Titulu horiek bi muga izango dituzte: ezingo dute gaintu finantza entitatearen baliabide propioen erdia, eta jabe bakar batek ezingo du bereganatu fondo propioen %5 baino gehiago.

Partaidetza mota horrek finantzaketa pribatuari bide berria ireki diezaioke —kutxa bakoitzari dagokio horien igorpe-

na erabakitzea—, eta horregatik, era guztietako iritziak sortu ditu neurri horrek.

Bestalde, kutxen administrazio organoeko presidenteen adinari ere muga ezarri dio PPk. Muga 70 urtetan ezarri du, eta neurri horrek hautsak astindu zituen erreforma aurkeztu zenean. Izan ere, La Caixa aurrezki kutxako presidente Josep Vilasarauk adin hori gaintzen du. Kontseiluetako kideak gehienez euren postuetan 12 urtez egon ahalko dira, gainera.

Banku eta kutxek ematen dituzten kredituetan ere aldaketa ekarriko du legeak. Kredituen interesa ezartzerakoan, eta interes aldakorrek kasuan kutxek eta bankuek «biribiltzea» egin ohi dute interesa eguneratzean, gehienetan gorantz. Orain arte, horren inguruan «lege hutsunea» zegoen, Madrilgo Gobernuaren arabera, eta horregatik, erreformak 0,125 puntutara mugatu du gorantzko biribiltzea hori.

LAN ISTRIPUAK

28 urteko langile batek bizia galdu du Azpeitiko Aceralia Redondosen

Erredakzioa | DONOSTIA

Langileentzat aste beltza izaten ari da oraindik amaitzear den hau, eta ostiral gauean, Aceralia Redondos —lehenengo Marcial Ucin— Azpeitiko lantegian (Gipuzkoa) beste langile bat hil zen, istripuz. Azken honekin, lau izan dira aste honetan bizia galdu duten euskal langileak. Gainera, lau horietatik hiru azpikontratatuturik ari ziren lanean —ostiralekoa ere halaxe zegoen—.

Francisco Arrebola Barranco 28 urteko behargin gaztea tentsio handiko kable batek elektrokutatuturik hil zen. Azpeitiko Aceraliako zuzendaritzak jakinarazi du ikerketa ireki duela, istripua zein arrazoiek eragin zuen argitzeko. Bestalde, ikuskatzaileek prebentzio neurriak bete diren aztertuko dute.

Aceralia Redondoseko langileek 24 orduko lanuztea egin zuten atzo goizetik hasi eta igande goiza bitartean. Bestalde, lantegiko zuzendaritzaren aurrean elkarretartzea egingo dute bihar, astelehenean, enpresa batzordeak eginiko deialdiari jarraituz.

LABek azpimarratu du azken urteetan istripu gehiago izan direla lantegi horretan. Sindikatuak «doluminak eta elkartasuna» adierazi dizkio langileen senideei, eta mobilizazioetan parte hartzea deitu du. Bestalde, enpresaburu eta administrazioa gogor kritikatu zituen sindikatuak, eta «hainbeste hildako noiz arte» jasan beharko ote diren galdetu.

LAB, prentsa oharrean, enpresaburuari eta administrazioari zuzentzen zaie, eta esaten elkarretartzeak egitea ez dela nahikoa, eta ez behar kopuruaren gaiaren inguruan «pauso bat haratago» joatea «beharrezkoa» dela.

Aste hau ez da batere ona izan euskal langileentzat. Eta urtea ere oso beltz doa. Izan ere, 2002. urtea hasi zenetik 112 langile hil dira.